

LA USC DI LADINS - VENERDI' 21 FEBBRAIO 2020

DEVOZION

Te preon Sènt'Ugèna, patrona de Fascia

En domenìa ai 16 de firé tel santuarie sun Ciaslir l Piscop Emerit de Trent Luigi Bressan à ofizià messa grana

«Voi sporjer mie bel salut e mie fon detelpai a duc voetres, cara jent de Fascia, che ence chest an ve aede binà e sie de rué cassù amò na outa dò la pedies de nesc aves che ge à semper dat onor a noscia Sènt'Ugèna.» Con chesta paroles per fascian l Piscop Emerit de Trent Mons. Luigi Bressan à tacà ite la zelebrazion liturgica te la bela geija sul Ciaslir de Vich en domenìa ai 16 de firé.

Chest an la sègra de Sènt'Ugèna era de domenìa e dachelanvia n grum de jent da duta la val à volù

tor pèrt a la procescion e a la messa tel santuarie per onorèr la patrona di fascegn. Autoritèdes religioses e ziviles, anter chestes la procuradora e senatora Testor, l conseier ladin Guglielmi, l'ombolt de Sèn Jan Florian, l president de l'Union di Ladins Brunel, la presidenta de l'ICL Battisti, la sorastanta de la Scuola Ladina Florian, l president del Consei General Pitscheider, l raprezentant del BIM Dellantonio, i capifrazion de Vich Rizzi e de Pera Bernard, l capo del Socors da mont Zulian, raprezentanc di Polins de

Fascia, di Studafech e de la Forestala, duc chenc à volù tor sù l'envit ofizièl del Comun general de Fascia percheche la sègra sie la festa de duta la comunanza de la val.

I preves don Erminio, don Andrea, don Mario, don Luciano, l diacon Antonio à ofizià messa ensem a l Piscop Bressan col didament de n bel grop de servidores. Dintorn utèr la bandieres di desvalives gropes de folclor e Museghes: l Grop folk de Cianacei, Gries, Dèlba e Penia, l Grop folk de Soraga, la Musega da Vich, chela de Moena, la Musega Auta Fascia, i Schützen e l'Union di Ladins de Fascia. L Cor de la Pief, vidà da la maestra Rosanna March e didà da ciantores de etres pajes, à vivènta con solenità la messa portan dant ence vèlch ciantia per fascian.

Bressan: «Se lascion èrder dal fech positif de Die che à ardù tel cher de Sènt'Ugèna»

Dantfora don Andrea, a inom de duta la comunanza, à ringrazià l

Piscop Emerit per sia prezenza e l ge à sport i augures de complian ajache en domenìa ai 9 de firé l'à compì 80 egn, te geija se à levà fort l batiman di fidei.

Endèna la zelebrazion (che è stata manèda fora ence en streaming) e la perdicia Mons. Bressan à uzà fora desvalives momenc de riflascion su la fegura de Sènt'Ugèna, sun sie ejempie de martire, sui insegnamenc che ne à lascià nesc aves, sul santuarie »simbol de la beleza de la religiosità ladina che è stat fat sù en aut percheche no se lasciassane embarlumer dai tenc messajes del mond modern – à dit l Piscop.

Sènt'Ugèna la vegn recordèda te desvalives dis de l'an, segn de la gran venerazion per chesta joena cristiana, alidanché la preon che la ne presserve da la malaties ma ence che la sostegne la mères che compra e che la ne deide a esser respetouse de nosc ambient semper più en pericol. Se lascion èrder dal fech positif de Die che à ardù ence

tel cher e te l'ènema de Sènt'Ugèna – à feni fora Bressan.»

Te la orazioni di fidei l'è stat preà per fascian ence per la Musega da Vich che chest an la compiesc 200 egn e che proprio l di de Sènt'Ugèna l'à volù tachèr ite sie festejamenc per chest emportant cedean toron.

La giornèda no era nia patoch freida e coscita n muie se à fermà dò messa sun Ciaslir per se goder la sonèdes de la Musega da Vich, i bogn grostoi enjigné da la voluntadives e ence n bicer de tè e vin ciaut, endèna che i Paicenadores à fat sia desmostrazion con la paicin.

Chi che à volù dèr sie sostegn per la cura paliatives de la Cèsa de Pausa à podù se proveder ence i biliee de la ola de la fortuna che è stata endrezèda te Ciasa de Comun.

Te Ciasa Marmolada enveze l'è stat inaugurà la mostra de la Musega da Vich che recorda i 200 egn de chest glorious grop musical, de chest podede lejer l'articol a piata 14.

Monica Cigolla



L Piscop Emerit Luigi Bressan endèna la procescion.

Foto: Giuseppe Weiss



La messa tel Santuarie de Sènt'Ugèna con Mons. Bressan e i preves de Fascia.